

# A NAXETURA DE SAMIANIGO

OSCAR LATAS

A istoria de Samianigo ye en reyalidá ra de o biello Samianigo situgato en l'atro costau de A Peña O Capituello, pus o primero no esistiba. No imos a dentrar en polemicas arredol de l'orixen zelta, ibero u romano, u a controbersia sobre o romano "Sabinianus", ni si os repuis anteriors a o sieglo III aparexitos en A Corona de San Salvador son l'antigo Samianigo. Anque a primer begata que aparixe documentato ye en 1035 como "Savignaneco" (J. Caro Baroja en o suyo triballo "Sobre toponimia de las regiones iberopirenaicas")<sup>1</sup>, en chuntar-se a o Reino d'Aragón, amanixe ya como un lugar de reyalengo en 1137, cuan a suzesión a ra dinastía Ximena, y contina sieglos dimpués con ista condiziún.

Iste nucleyo rural no estió nunca, ni o lucar ni os suyos bizins, baxo ro mando de dengún señor particular como atos lugares de a redolada; estió dende a Edá Meya patrimonio dreito de a corona<sup>2</sup>. Enta finals de o sieglo pasato Samianigo Pueblo yera un chiquet lugar rural con bellas benticuatro casas, en parti de as cuals i bebiban por os meyo d'ers, de o cautibo de os campos y de o ganato. En as tierras se sembraban blaus de secano, más que más trigo, antimás de un güerto ta o consumo de casa, y como ganato, a más gran parti en yera güellas, con bel bacumen. En bella casa, bel gua, cambeato dimpués por bel macho, bel cochín ta bender os latons y pirinas ta bender os güegos.

Respeutibe a ra ganadería se puede beyer que as zifras bandían poco dica ra plegata de as fabricas, pus en 1858, bi eba 746 güellas (entre güeito casas cuasi totas), 36 machos, a macho por casa, como muito en una casa en bi eba tres, y trenta bacas, estando-ne o normal dos por casa. En 1905 bi eba trenta ganaders, con un total de 34 machos ta ras fainas de o cambo, 36 exemplars entre guas y bacas y 706 güellas en total, u seiga, prauticamén o mesmo que a meyatos de o sieglo pasato.

En a "Guía Regional de Aragón", de l'añada 1914, se diz que Samianigo ye un lugar do ras prenzipals produziuns son os zerials y o bino. Sobre íste zagüero nos ha plegato toponimos d'o Barrio Estaziún como ros "fajetones de biñas" d'o batanero de Lo Puen, que bi son entre a Partida de Cruzellas y o Tesoro. Isto fa pensar en ixo cautibo, a o que en os presupuestos municipals de 1921, se destina una partida ta ra luita contra ra filoseira (laquia de as zepas). Cautibo, manimenos, que nunca pasarba de l'autoconsumo, como ros güertos d'a Tolibana u os fruitals d'os Arregués. Tamién podemos saper d'atros árbols que yeran en os nuestros campos a trabiés de toponimos como A Zeroldera, A Lezinosa u Tremolar,<sup>3</sup> que se traduzen a o castellano como *serbal*, *carrascal* y *alameda*.

Atras casas no podeban sobrevivir con os recursos d'ers y cautibaban a poca tierra que teneban, abendo a ir d'ibierno a triballar ta Franzia, u ta Tierra Baxa a cullir olibas. Dica ra plegata de as fabricas. D'allora en adebán, ista chen no tenerban que jopar de a redolada, anque tamién, d'un atro costau, as fabricas trayoron un nuebo modo de bida, o que conlebarba cambeos en a traza de pensar.

Con enchaquia de ro creximiento industrial, fueron instalando-sen diferens establimientos y asinas, en primeras, enta 1910 Samianigo teneba una uzena de botigas aliniatas a o largo de o Paseyo de a Estaziún; yeran una mena de miniferia continua; en bi eba de pletas ta cochins; no podeban mancar as estrabillas, que serbiban como alparcamientos ta o transporte de a epoca (os machos). Se i lebaba ra lana y se bi compraban os produitos (mercaderías) que i puyaban os arriers.

Antis de a plegata de as interpresas, as primers botigas estieron<sup>4</sup> as de Oliván, Ferrer y Vidales, istos dos zagüers tamién en teneban de posada y carnizería; como furnos de pan en bi eba os de Bielsa y Vidales, os estancos de Oliván y Rapún, comercios de texíus de Bielsa y Oliván, a zapatería de Antonio Torres y l'alpargatería de Benito Grasa. Pero tamién bi eba atras profesions, aparti de comercians, como os fusters Manuel Periel y Francisco Sánchez, que tamién yeran piquers, y o ferrero Melchor Sánchez. En l'añada 1911 plegó dende Yebra Leonardo Coli.

<sup>1</sup> C.S.I.C., Barcelona. 1955.

<sup>2</sup> Adolfo Castillo, "Bimilenario de Sabiñánigo". 1972.

<sup>3</sup> Toponimia d'o "Catastro de Sabiñánigo". 1848.

<sup>4</sup> "Guía de la Provincia de Huesca", Adrián Hernández. 1908.

Asinas crexió ro bico de ra estazió como puesto ta serbizios, con comerzios, fondas, farmazia, bars y botigas. Tot enfilato a o turismo que puyaba ta o balniario de Pandicosa y aprobeitando ro feito d'estar un nugo de comunicazións.

Más tardi, en as añadas bente, se creyan fusterías y otros talleres atrayitos por as interpresas, antimás de botigas y bars ta atender a os obrers.

Cuan plega o ferrocarril, Samianigo pasa d'estar un puesto esconoxito a estar-ne uno obligato de confluencia de os abitadors de a redolada, de Sobrepuerto y tensinos, escomenzipiando con ixo as primers edificazións, estando-ne a primera Casa Roldán Biella, debantata en 1887 y disparexita en as añadas 50, y que yera situgata enfrén de do dimpués s' edificó a estazió de tren, en 1893. Más tardi en siguioron atras a o rafe de a nuaba carretera feita enta ra bal, estando ros Bielsa y os Rapún, que prozedeban de Lo Puen, os primers en dobinar o esdebenidero comercial de o nuevo lugar. Con tot y con ixo, as edificazións yeran muito modestas, emplegando-sen materials de o país (prezipalmén salagón) dica en os tellatos (de losa). As casas yeran nuabas, sin de pretensións, y en bella traza feitas a ro estilo de os nuevos lugares de l'ueste americano<sup>5</sup>, chunto a o camín en carrera ampla y unica. A chen, pensando en os suyo asentamiento ta cutio, feban as suyas casas. A man d'obra espezializata yera tota forana, por ixo ro cosmopolitismo de Samianigo.

Por astí pasaba un camín que d'este ta ueste uniba ras bals (o camín que trayeba a Santa Orosia); dica prezipios de sieglo, Samianigo yera parada en a ruta que uniba Chaca con Fiscal por meyo de bajas, pus as carreteras d'agora ban por as antigas cabañeras, como a que baxaba ta Uesca, e isto daba lugar a os mesons cabañers a o largo de o camín. Un mesón cabañero enta Acumuer podeba estar Casa Roldán, de a mena de o Mesón Quemau, ta fer onra a os que tramenaban os camins d'allora. Os bajas teneban que repostar, asinas, os que plegaban de Chaca, y antis de puyar ta o balniario de Pandicosa, cambeaban o tiro de caballos en una caseta que bi eba en Cartirana.

A carretera ta Uesca tenerba que asperar dica bella miqueta antis de a guerra zebil ta construir-se. Atra carretera, a de Biescas ta Pandicosa, s'eba arreglata en 1881, y Samianigo preta a creixer arredol de ro camín arbolato que lebaba ta o balniario de Pandicosa, y que toz clamaban o paseyo de a estazió<sup>6</sup>.

Ha contribuyito a ra formazió de O Barrio en ista actual forma, ra topografía de o terreno, con repingatas costeras a os dos costatos de a carretera, que fan difizil a edificazió; en bels casos por tot o que cal picar en a peña, y en otros por a gran obra muerta que s'amenista ta arrancar l'alazet ta construir bibiendas. D'astí que s'aiga formato un "pueblo calle", teniendo como pundos de referencia en primeras a estazió, dimpués a Plaza Aragón (enguán Plaza España) que yera ra plaza de o pueblo, más tardi ra carretera que puyaba ta o Balniario, y en zagueras a carretera que lebaba enta ras fabricas.

Samianigo ye fruto de a casualidá, de una parti proyeutos iniciais de ferrocarril que lo marguinan y barians que l' arrodeyan; como fautors que chugan a o suyo fabor, terrenos en Chaca que son caros, conzesions de ra Cuanga de o Galligo a EIASA..., a ra fín, fautors que esen alterato ro prozesos de a suya desembolicadura.

Pero Samianigo en que s'asienta esdebién pionero en incorporar prozesos industrials a ran mundial, en produzir aluminio a libel estatal y, en un atro cambo, ye o primero que adedica ra suya ilesia a Cristo Rey en 1929. Se son perditas muitas cosas: l'ambién sindical (más de 200 presonas en as asambleyas), l'ambién cultural (teyatro, zine).

Ye cuan menos estranio que s'aiga xuplidato adedecar carreras a os primers y azerrinos alcaldes de Samianigo (José Bielsa, Pablo Ger), u presonas relebans (Rafael Jutglar, Pardo Asso) asinas como a l'amiro de toponimos locals (Cruziellas, Sandaín, Barrocal).

Calerba pensar si as condizións que se i daban allora ta l'asentamiento industrial y o suyo desarrollo continan existindo en l'actualidá, ye dizir as suyas comonicazións, pre de ra enerxía eleutrica y de os terrenos, u potencialidaz turísticas. Talmén mirando en o nuestro pasato trobemos a soluzió ta os problemas de o nuestro presén.<sup>7</sup>

<sup>5</sup> Salvador López Arruebo. "Programa de Fiestas". 1963.

<sup>6</sup> Domingo J. Buesa. "Argensola", IEA. 1981.

**42** <sup>7</sup> Agradexco l'aduya en a redazió en fabla d'iste articlo a Ernesto Franco.